

等

日頭那得欲落山

阮的目睷就金金看

遠遠行來一群一群放學的學生囡仔

阮詳細佇咧尋 尋一個古錐的形影

阮知影 差五分 差十分不算啥

m 閣 心肝頭就是講不聽

天色已經暗落去

阮的目睷 iah m 敢 nih

遠遠駛來一台一台的轎車

阮一直咧等 等一個熟悉的車影

阮知影 慢五分 慢十分不算啥

m 閣 心肝頭猶原講不聽

怎會目睷才 nih 一下

阮就欲 kah 你 [khàm](#) 頭紗

戶碇那跨過 你就是另外一家

車 一直駛 一直遠

阮的心肝像膨紗 互伊 giu 得長 長 長

阮知影 以後

m 免閣再等了 m 閣

心肝頭甘講會聽